



PRIVREDNA KOMORA KANTONA SARAJEVO

Broj: 04/MK/ 16 - 35/09
Sarajevo, 12.03.2009. godine

BOSNA I HERCEGOVINA
FEDERACIJA BOSNE I HERCEGOVINE
KANTON SARAJEVO
VLADA KANTONA
71000 SARAJEVO
Reisa Džemaludina Čauševića 1

PREDMET: Primjedbe, prijedlozi i sugestije na Nacrt budžeta Kantona Sarajevo za 2009. godinu

Na sjednici Upravnog odbora Privredne komore Kantona Sarajevo, održanoj 12.03.2009. godine, u proširenom sastavu sa predstavnicima vodećih kompanija u Kantonu Sarajevo, razmatran je **Nacrt budžeta Kantona Sarajevo za 2009. godinu**.

U veoma opširnoj i konstruktivnoj raspravi usvojene su sljedeće primjedbe, sugestije i prijedlozi.

PRIMJEDBE I SUGESTIJE

1. Uključujući se u javnu raspravu o Nacrtu budžeta Kantona Sarajevo za 2009. godinu, privrednici su ocijenili **pozitivnim** sljedeće:

- što je data mogućnost privredi da izrazi svoje mišljenje i prijedloge na Nacrt budžeta,
- što je Skupština Kantona Sarajevo, cijeneći društveno-ekonomsko stanje u zemlji i u Kantonu Sarajevo, utvrdila manji obim sredstava u Budžetu za 2009. godinu u odnosu na prethodnu godinu.

2. Međutim, privrednici ocjenjuju **negativnim** sljedeće:

- što je ostavljeno veoma malo vremena za kvalitetnu pripremu za javnu raspravu s obzirom da se radi o veoma složenoj i obimnoj materiji,
- što u dokumentu «Makroekonomski pokazatelji i analiza njihovih efekata» datom uz Nacrt budžeta, nije ozbiljnije analizirano stanje u svjetlu djelovanja svjetske ekonomske krize na poslovanje privrede u Kantonu Sarajevo. Pokazatelji privrednih kretanja u četvrtom kvartalu 2008. godine i početkom 2009. godine ukazuju na ozbiljno ispoljavanje krize koja se posebno manifestuje u smanjenju obima proizvodnje, izvoza, investicija, zapošljavanja i drugih elemenata



71000 Sarajevo, La Benevolencija 8,
Tel. (00 387 33) 250 100, 250 101, 250 196, Fax: (00 387 33) 250 137, 250 139
www.pksa.com.ba; webmaster@pksa.com.ba

- što i ovoga puta Budžet nema razvojni karakter jer su izostala značajnija izdvajanja u Budžetu za poticaje privredi,
 - što je ostao višak rashoda nad prihodima iz 2008. godine od 20 mil. KM, što će znatno opteretiti Budžet u 2009. godini
 - što se u polaznoj osnovi za izradu Budžeta nije vodilo računa o Programu mjera za ublažavanje globalne ekonomske krize i unapređenje poslovnog ambijenta, usvojenog na Ekonomsko-socijalnom vijeću za teritoriju Federacije BiH.
3. Sredstva iz Budžeta ne bi trebalo koristiti za direktno subvencioniranje firmi sa većinskim državnim kapitalom jer stavlja u neravnopravan položaj konkurenciju s privatnim vlasništvom koja putem poreza izdvaja vlastita sredstva u Budžet, nego bi se trebalo vršiti subvencioniranje direktnih korisnika socijalnih potreba.
 4. Ne prihvatljivo je da prosječne plaće i ostala primanja u organima uprave (topli obrok, regres i sl.) budu drastično veći u odnosu na privredu. To je posebno neodrživo u uslovima ekonomske krize kada svi organi i institucije, koje se finansiraju iz Budžeta, trebaju dijeliti sudbinu sa privredom.
U tom kontekstu, neophodno je hitno pristupiti racionalizaciji državne uprave kroz smanjenje broja zaposlenih.
 5. Imajući u vidu posljedice recesije i probleme u vezi sa redovnim izmirenjem obaveza bankama, potrebno je da Vlada Kantona Sarajevo, u saradnji sa drugim nivoima vlasti, Agencijom za bankarstvo i komercijalnim bankama, sagleda mogućnost reprogramiranja kredita, posebno hipotekarnih kredita, kao i preispitivanje rokova otplate, grejs perioda i visine kamatnih stopa kako su to uradile i druge zemlje.

PRIJEDLOZI

1. Povećati sredstva iz Budžeta Ministarstvu privrede kako bi ono moglo snažnije intervenisati u privredi na ublažavanju globalne ekonomske krize na račun drugih stavki iz Budžeta predviđenih za finansiranje aktivnosti koje se mogu odgoditi za izvjesni period.
2. Plaće u upravi zadržati na nivou 2008. godine, a iznos planiranog povećanja za plaće (oko 10 mil. KM) usmjeriti u Kreditno-garancijski fond Kantona Sarajevo iz kojeg će se finansirati strateški projekti od značaja za razvoj Kantona Sarajevo i vršiti poticanje privrede, posebno izvozno orijentisane privrede.
3. Ostale naknade za zaposlenike u upravi predviđeni u Budžetu (topli obrok, regres, dnevnice za službena putovanja, reprezentacije i dr.) uskladiti sa visinom isplata ovih naknada u privredi, a razliku sredstava po tom osnovu usmjeriti u Kreditno-garancijski fond Kantona Sarajevo.
4. Sredstva predviđena u Budžetu za rekonstrukciju ulica, tramvajskih pruga i dr., koja se zbog nekvalitetnog izvođenja radova obnavljaju svake godine, prepoloviti i razliku sredstava usmjeriti u Kreditno-garancijski fond.

5. U Budžetu «ostali ugovoreni poslovi» preispitati sa ciljem da se i dio ovih sredstava usmjeri u Kreditno-garancijski fond.
6. Prihode Direkcije za robne rezerve treba jačati kako bi bila sposobna za intervencije u privredi izazvane poremećajima na tržištu usljed djelovanja globalne ekonomske krize.
7. Sredstva u Budžetu za 2009. godinu, planirana za rješavanje imovinsko-pravnih odnosa usmjeriti u Kreditno-garancijski fond.
8. Restruktuirati Budžet za 2009. godinu tako da znatan dio sredstava ide za obezbjeđenje rješavanja socijalnih problema.

Privrednici Kantona Sarajevo očekuju da ovi prijedlozi budu prihvaćeni kako bi se stvorila mogućnost, između ostalih mjera, da se iz Budžeta može intervenisati za podsticanje privrede.

Posljedice svjetske ekonomske krize nije moguće rješavati putem zadržavanja nivoa javne potrošnje na račun zastoja i ograničenja privrednog razvoja već, naprotiv, realizacijom razvojnog koncepta na kojem treba da se bazira i Budžet Kantona Sarajevo u 2009. godini.

PREDSJEDNIK

Kemal Grebo, dipl.oec.